



REPUBLIKA E SHQIPËRISË  
**AUTORITETI I KONKURRENCËS**  
**KOMISIONI I KONKURRENCËS**

**VENDIM**

**Nr. 501, Datë 15.03.2018**

“Mbi shitjen dhe transferimin e aksioneve të Bankës NBG Albania SHA, nga Banka Kombëtare e Greqisë S.A tek Banka Amerikane e Investimeve SHA”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

në mbledhjen e tij të datës 15.03.2018, shqyrtoi çështjen me:

**Objekti:** Shqyrtimin e raportit të Sekretariatit mbi autorizimin e përqendrimit të realizuar nëpërmjet shitjes dhe transferimit të aksioneve të Bankës NBG Albania SHA, nga Banka Kombëtare e Greqisë S.A tek Banka Amerikane e Investimeve SHA,

**Baza Ligjore:** Ligji Nr. 9121, datë 28.07.2003 “Për Mbrojtjen e Konkurrencës”, i ndryshuar, neni 24, germa d, nenet 2, 10 - 12, dhe neni 16 dhe Kreu IV “Procedurat për kontrollin e përqendrimeve” nenet 53 - 64, Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit” dhe formulari i thjeshtuar “Për njoftimin e përqendrimit”.

**Komisioni i Konkurrencës**, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë, mbi njoftimin e përqendrimit nëpërmjet shitjes dhe transferimit të aksioneve të Bankës NBG Albania SHA, nga Banka Kombëtare e Greqisë S.A tek Banka Amerikane e Investimeve SHA,

**VËREN SE :**

Autoriteti i Konkurrencës në datë 07.02.2018 ka marrë njoftimin në lidhje me Marrëveshjen për Shitblerjen e Aksioneve të ndërmarrjes Banka NBG Albania SHA, të zotëruara 100% nga Banka Kombëtare e Greqisë S.A, tek Banka Amerikane e Investimeve SHA.

**Blerësi:** Banka Amerikane e Investimeve SHA, krijuar dhe regjistruar si person juridik shqiptar me vendim e Gjykatës së Rrethit Gjyqësor Tiranë nr. 20830, datë 12.02.1999, me Objekt të veprimtarisë: *Të pranojë depozita të çdo lloji me ose pa interes, të ushtrrojë aktivitetin kreditues duke përfshirë kredinë e konsumit kredinë hipotekare, financimin e bizneseve dhe transaksioneve të ndryshme tregtare, të marrë hua, të blejë e*

*të shesë për llogari të saj dhe të klientëve instrumente të tregut të parasë, të kryejë të gjitha format e pagesave në favor të klientëve sipas standardeve ndërkombëtare, të emetojë letra me vlerë të çdo lloji dhe të kryejë të gjitha llojet e veprimeve me to.*

**Shitësi:** Banka Kombëtare e Greqisë S.A, një shoqëri anonime e organizuar dhe që vepron sipas ligjeve të Republikës së Greqisë.

**Ndërmarrja Target:** Banka NBG Albania, krijuar dhe regjistruar si person juridik me vendim e Gjykatës së Rrethit Gjyqësor Tiranë nr.12847, datë 22.11.1995, me Objekt të veprimtarisë: *Të kryejë veprimtaritë për pranimin e depozitave dhe fondeve të tjera nga publiku, të gjitha format e kredi-dhënies duke përfshirë edhe kredinë konsumatorë e kredinë hipotekare; qiranë financiar, të gjitha shërbimet e pagesave dhe të transferimit të parave, duke përfshirë kartat e kreditit dhe të debitit, çëqet e udhëtarit, çëqet bankare dhe kartat e pagesës; ofrimin e garancive dhe marrjen e angazhimeve; tregtimin për llogari të saj ose për llogari të klientëve qoftë edhe në një këmbim valutator në një treg të vetë-organizuar etj.*

Objekt i marrëveshjes mes palëve është *“Shitblerjen e Aksioneve të ndërmarrjes Banka NBG Albania SHA, të zotëruara 100% nga Banka Kombëtare e Greqisë S.A, tek Banka Amerikane e Investimeve SHA”.*

Në zbatim të ligjit nr. 9121 datë 28.07.2003 “Për Mbrojtjen e Konkurrencës”, i ndryshuar, palët në transaksion plotësojnë kriteret e përcaktuara në nenin 10 dhe 12, pika 1 të tij dhe si rrjedhojë ky transaksion ju nënshtrua procedurës së kontrollit të përqendrimeve të parashikuar në nenet 53 – 64 të Ligjit.

Transaksioni është një bashkim me përthithje i Bankës NBG Albania SHA nga Banka Amerikane e Investimeve SHA.

### **Vlerësimi i përqendrimit**

Palët në marrëveshje ushtojnë aktivitetet në tregun bankar, janë konkurrentë aktual dhe referuar Udhëzimit “Për vlerësimin e marrëveshjeve horizontale” përqendrimi i synuar klasifikohet si një përqendrim horizontal.

Në zbatim të nenit 3, pika 7, të ligjit nr. 9121, Udhëzimit nr.76, datë 07.04.2008 “Për përcaktimin e tregut përkatës”, dhe Udhëzimit nr.131 datë 07.12.2009 “Për vlerësimin e marrëveshjeve horizontale, përcaktimi “treg përkatës” i referohet: Tregu përkatës i produktit - konsideruar - tregu i shërbimeve bankare; dhe Tregu përkatës gjeografik – konsideruar - territori i Republikës së Shqipërisë.

Nga vlerësimi i strukturës së tregut për treguesit kryesorë të sistemit bankar; aktivet, depozitat dhe kreditë u konstatua se:

- Në tregun e aktiveve, tregu bankar në Shqipëri klasifikohet si një treg mesatarisht i përqendruar ku indeksi i Herfindahl- Hirschman (HHI) është në vlerën XXXX.
- Pas përqendrimit pjesa e kombinuar e Banka Amerikane e Investimeve SHA dhe Banka NBG Albania SHA do të shkojë në XX % të totalit të aktiveve dhe Indeksi HHI do të shkojë në vlerën XXXX ku  $\Delta$  HHI do të jetë në vlerën XX.
- Tregu bankar klasifikohet si mesatarisht i përqendruar në terma të depozitave ku HHI është XXXX. Pas përqendrimit pjesa e kombinuar e Banka Amerikane e Investimeve SHA dhe Banka NBG Albania SHA do të shkojë në XX % të totalit të depozitave dhe  $\Delta$ HHI është XX.
- Në produktin e kredisë, tregu paraqitet më strukture mesatarisht të përqendruar ku HHI është në vlerën XXXX, kurse pas përqendrimit pjesa e kombinuar e tregut të dy

ndërmarrjeve Banka Amerikane e Investimeve SHA dhe Banka NBG Albania SHA do të shkojë në XX % të totalit të kredisë dhe ΔHHI është XX.

Referuar Udhëzimit “Për vlerësimin e përqendrimeve horizontale”, pika 12, në ato përqendrimë ku indeksi HHI pas përqendrimit është midis 1000 dhe 2000 dhe delta HHI është nën 250, Autoriteti nuk identifikon probleme që lidhen me konkurrencën në nivel horizontal.

Nga sa më sipër vlerësojmë se struktura e tregut bankar pas përqendrimit nuk do të përbëjë problematikë për konkurrencën në treg pasi pjesa e tregut e dy bankave është shumë e vogël.

Sipas deklaratës së palëve në njoftim, Banka Kombëtare e Greqisë S.A, aksionari i vetëm i Banka NBG Albania SHA, synon të largohet nga tregu shqiptar, si rrjedhojë e impenjimeve që ka marrë me Bankën e Greqisë dhe Bankën Qendrore Evropiane në kuadër të planit të saj të rimëkëmbjes dhe ri fokusimit strategjik. Në dy vitet e fundit Grupi NBG ka shitur filialet në Turqi, Bullgari, Serbi dhe është në proces aktiv për të përfunduar procesin e shitjes në Shqipëri, Rumani dhe Qipro. Gjatë vitit 2018 pritet të vijojë edhe me shitjen e filialit në Maqedoni.

### **PËR KËTO ARSYE:**

Komisioni i Konkurrencës, në bazë të nenit 24, shkronja d, dhe nenit 56 pika 1, të Ligjit Nr. 9121, datë 28.07.2003 “Për Mbrojtjen e Konkurrencës”, (i ndryshuar),

### **VENDOSI:**

1. Të autorizojë shitjen dhe transferimin e aksioneve të Bankës NBG Albania SHA nga Banka Kombëtare e Greqisë S.A tek Banka Amerikane e Investimeve SHA.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

### **KOMISIONI I KONKURRENCËS**